

四庫全書

集部

欽定四庫全書

集部

運覺漫稿卷六

詳校官編修臣翟槐

中書臣劉源溥覆勘

總校官庶吉士臣何思鈞

校對官中書臣李荃

謄錄舉人臣孫炯

欽定四庫全書

蓮甕漫稿卷六

五言絕句

葵花

葉露曉瀼瀼
高藂繞砌傍
孤吟看不厭
只為解傾陽

榴花

花盛紅巾艷
枝攢綠葉深
開軒閑玩久
聊悅病來心

明 李昌祺 撰

獨坐

病來成懶惰兀兀惟孤坐火冷篆煙消風簾柳花墮

官舍

門巷少人來閑堦長綠苔石榴三五樹樹樹手親栽

鶯

溜亮語交交閑枝且托巢鷹鷂尚黃口側目在高梢

燕

葺壘去來忙嘒嘒語夕陽茅簷最安穩莫戀杏為梁

詠小室前孤樹

高枝已出墻新葉方舒翠
賴爾豁憂懷朝朝坐相對

七言絕句

題道士黃宇中小景

赤鯉洲前紫極宮
盡無桃樹只青松
風光不似玄都觀
也有遊人到此中

滿地涼陰滿徑苔
梨花開遍橘花開
山門竟日無雲鎖
挈榼攜壺任客來

飲罷庭前樹影移城南城北路多岐
丁寧少長忙歸去
莫待雲深日暝時

竹樹蕭森白晝清人間此是小蓬瀛
黃冠只說修行好
爭奈浮生戀世情

天壇職錄本清高戒行寧容失一毫
為謝門前相過客
若還要學恐徒勞

六根變幻苦縈纏道長魔高自昔然
倘使飛昇容易得
世間誰不是神仙

微雨行秋送嫩涼
藍珠誦罷禮虛皇
勦勦一枕蒲團睡
便是長生不死鄉

多少全真去坐圜
原來與已不相關
若非親見張平叔
四百金丹也是閒

重之京舟中夢覺作

數行清淚不禁揮
北去南來計總違
夢裏不知今又別
對人猶自說初歸

茶陵夜泊

山抱荒村水背城
簫簾聽灘聲
秋風浙瀝秋江冷
人自思家月自明

廣西公廨夜宿

白月紛紛照屋梁
羈懷無寐對清光
浮雲不掩團團影
只與離人照夜長

贈太常張丞山水圖十三首

瀟灑茅堂水石邊
青青草色滿簾前
經旬不出緣何事
寫就黃庭內景篇

千峰萬壑翠嵯峨車馬長年少見過泉可濯兮田可稼
比儂盤谷不爭多

秦中本自好溪山況在終南鄠杜間占得林泉清勝處
投簪莫待老方還

棟花風過水平堤兩雨林鳩屋上啼因看青山門忘掩
浮雲直到榻前棲

白石蒼苔一徑通軒窗涼逗煮茶風時時吹落林花片
滿地深紅間淺紅

隔塢炊煙半有無東鄰西舍往還疎
蒼蒼茂樹娟娟竹
何處人家似此圖

山深地僻夏如秋門巷蕭條竹樹幽
步過溪南看晚景
牧童吹笛倒騎牛

荷繞清溪柳繞莊時時濯足向滄浪
不知水鳥緣何事
飛去飛來自底忙

樹樹榴花爛漫開堦前鶴跡印蒼苔
銜泥燕子歸飛急
風送前山驟雨來

雲屏四面翠周遭松桂陰濃野竹高
比似武陵應更好
溪邊只欠幾株桃

牆頭柳嫩綠毵毵橋下新流色勝藍
扶杖出門緣送客
飛花幾片點春衫

閒心只與靜相宜醉似踈狂醒似痴
除却看山看水外
是非榮辱不曾知

年來兩鬢雪蕭蕭懶把黃金帶繫腰
擬向江南尋舊隱
白雲莊上狎漁樵

楊柳枝

春來婀娜裊煙青
花落春江化作萍
隨水東流飄泊去
比郎蹤跡更無憑

參差幾樹瞰長河
樹樹垂金拂綠波
不是秋來易零落
自緣人世別離多

細葉如眉綠未勻
修眉渾似帶愁顰
輸他桃杏東風裏
不管南遊北去人

搖青曳綠汴河邊
濃比征袍色更鮮
謾有柔條千萬縷

如何不解繫郎船

題喜鵲圖二首

一雙飛下立斜暉
特地查查近繡幃
笑倚綠窻聽未了
小鬟低語報郎歸

對立梅梢似欲鳴
含情傾聽却無聲
摩挲醉眼行前看
不是生成是畫成

送人還鄉

淮水寒潮起暮雲
紛紛離思不堪論
都門不閉還鄉夢

昨夜分明到故園

經鳳臺門

鳳凰岡上閒原少
舊塚新墳次第排
黃壤豈能分貴賤
輿臺將相一般埋

醉中遣興

眼前無物不關情
濁酒從教醉復醒
醉裏不知為客久
金陵却道是廬陵

秋日對菊

席有塵埃徑有苔
舊時知己少曾來
多情獨愛庭前菊
肯不羞貧歲歲開

遊靈谷寺

十丈浮屠萬疊山
誰移兜率下人寰
非因酷愛僧房好
貪看青松忘却還

送別

壺傾酒盡棹歌催
日影平西送騎回
最是秋風憐客別
沙頭緩送布帆開

江上作

野水浮雲任所之，渚鷗汀鷺識心期。
閑身到處貧無物，只有唐人幾卷詩。

題五峰僧寺悼住此庵上人

旅食京華七度秋，重來無處覓湯休。
萬株松樹千竿竹，夢寐平生儻此遊。

悼王翁二首

隨分棺衾足掩身，不勞帛客嘆家貧。
白頭贏得青山葬。

多少寒沙暴骨人

海上歸來牖下終去時同伴葬遼東重泉莫嘆桐棺薄
玉匣蘧蒢等是空

重遊龍濟寺悼無為能上人

北涉南遊二十霜幻身重到贊公房苔侵素壁松枝偃
獨自焚香拜影堂

小窓夏日即景

樹影輪囷日影微槿花爛漫芷花稀青蠅不畏儒衡扇

何處爭來撩亂飛

朱給事自南中回相過

瘴海歸來話舊遊
低頭長揖淚交流
傷心忍說來時事
半里盤灘萬髑髏

鬻峰老僧

南禮曹溪北五臺
雙眉覆面眼慵開
不知僧臘今多少
庭檜參天手自栽

宿正覺寺僧房

露鶴寒猿永夜清
山僧入定泯羣情
幽人獨向堦前坐
為惜千峰好月明

北京送人南歸二首

衣染緇塵鬢欲華
病身飄泊在天涯
角聲吹斷還鄉夢
只到金陵不到家

宦況鄉心共寂寥
秋蓬涼葦總蕭蕭
西風似欲留人住
吹得垂楊挽去橈

客夜聞砧

荒草蕭蕭郭隗臺清砧明月兩堪哀
千愁百感多如雨
今夜燈前一併來

房山旅舍

枕寒衾冷對孤燈
室似郵亭榻似僧
清淚幾行揩又落
斜風細雨送殘更

歸次呂梁洪

呂梁洪水激衝波
桂楫蘭橈此處多
去日少年歸日老
人生能得幾回過

泊龍潭

南轅北轍盡何求
鬢不如霜不肯休
輸却江天漁婦火
尋常夜夜照扁舟

西園精舍

社近芳花爛漫開
不關風雨自沾苔
幽禽驚避蒼鷹逐
亂入香紅颭下來

村舍燕

壘破頻頻旋補泥
雙飛雙語更雙棲
雕梁雖貴茅簷穩

金分四庫全書
暮去朝來莫怨低

涓川田翁

辛勤雨壘復煙疇
醉卧槐陰石枕頭
少小為農今老大
不曾騎馬只騎牛

田婦

諳盡條桑與藝麻
豈知城市有繁華
年年看得蠶絲熟
不入貧家入富家

宿金鄉鋪

寂寞郵亭戶半扃茅茨破處見疎星
四無鄰舍興臺睡
露自成霜水自冰

興國寺與僧話禪

僻性長嫌驛舍喧蒲團到處宿祇園
機鋒已被曼珠逗
可是毘耶更有言

許州城外

蓼折荷枯柳葉空荒畬斷壟見羣農
登龍門館今何處
古木棲鴉夕照紅

曉行

月華清淡露華零
喔喔雞聲轎上聽
爭似釣魚船底睡
蘆花被暖酒初醒

江渚見鴛鴦

相隨相顧復相親
端的韓憑是汝身
莫向汀洲交頸宿
江邊方有獨行人

舞陽留侯廟二首

信族稀夷越
醞躬太平無
復用英雄
高皇却墮先生計

世上何曾有赤松

人心變幻幾千般帶礪盟深亦易寒秦網逃來逃漢網
誰將此意語蕭韓

重宿僧寺三首

人稀院靜戶長扃清磬泠泠已厭聽欲滌平生塵土念
半幽圓覺貝多經

荒城晏歲野僧房迢遞他鄉憶故鄉病骨不禁風雪冷
一更渾似一旬長

空房不見款冬花
簷鐸敲風日影斜
隨意看來隨意脫
緋袍那似佛袈裟

驚鴨池

水面殘冰漾淺漪
臨流駐馬立多時
不因常侍成奇蹟
千載誰知有此池

滎陽懷古

廣武城邊古戰場
漢高曾此割封疆
若無紀信乘黃屋
縱有蕭韓事巨量

新安謠三首

新安野老髮垂肩說著先朝淚泫然
洪武初年真少事
幾曾輕到縣衙前

垂老頻逢歲薄收秋租多欠賣耕牛
縣官不暇憐飢餒
喚拽官車上陝州

當夫當匠子孫亡田地荒蕪戶有糧
昨日迤西蕃使過
盡驅婦女趕牛羊

山路謔花

枝頭地上揔猩紅
幾樹繁開幾樹空
顏色一般榮悴異
誰將此意問東風

花答

多謝天公著意栽
不教粧點艷亭臺
無人剪折無人賞
贏得年年自在開

題怪石牡丹孔雀圖

不上屏風不用憐
鈿毫金縷爛相鮮
雙瞳贏得無人射
翹立花妃石丈前

山中見牡丹

不嫌惡雨并乖風且共山花作伴紅
縱在五侯池館裏可能春去不成空

重吟山中牡丹

不煩澆灌不煩栽長過清明穀雨開
為問洛陽豪貴客幾家還有舊亭臺

過張茅鎮見飢民

土洞深沈土坑歆田園枯旱廢耕犁
一身餒困渾無力

猶上高梯剥樹皮

宜陽山中

綠陰重疊鳥間關
野棗花香宿雨殘
天遣浮雲都捲盡
教人一路看青山

嵩陽道中

度盡青山幾百重
垂蘿弱日鳥啼風
不嫌幽獨無人伴
長在花香樹色中

四月八日寓陝州僧舍

白楊新葉嫩蕭蕭野寺春歸更寂寥曉殿敲鐘僧俗佛
鵲崙柏子滿爐燒

小滿日口號

久晴泥路足風沙杏子生仁棟謝花長是江南逢此日
滿林煙雨熟枇杷

宿襟山寺

竹樹陰陰覆化城白蓮池水照人清明朝又向紅塵去
辜負垂楊百轉鶯

嵩縣過端午

老大偏多故里心
一逢佳節一沾襟
誰知此日菖蒲酒
又在山城獨自斟

題老馬圖

生來骨相本拳奇
無復騰驤似昔時
太僕憐才如見惜
只教閑放莫教騎

光州公館夜宿

病身堪嘆復堪憐
一盞寒燈照客眠
雨滴芭蕉風撼竹

蕭蕭瑟瑟破窓前

題風柳喜鵲圖贈人二首

春光淡薄景遲遲
特地飛來噪柳枝
應是高門多喜事
殷勤先報主人知

宿雨朝來乍放晴
游絲裊處暖風輕
綠楊深院人初起
笑聽喳喳第一聲

梨花錦鳩圖二首

參差雪蕊漸開齊
山鳥梳翎自在棲
絕似江南春二月

杏花疎雨一雙啼

能言鸚鵡閉金籠
爭似鉤輅野樹中
贏得人嫌生性拙
梨雲影裏立東風

秋塘鵲鵲圖二首

斜日輕煙水渺茫
鵲鵲相對立蓮房
吳儂只愛吳中好
彭越螭蟀使斗量

波漂菰米滿滄洲
菱葉蕭疎藕葉秋
日暮採蓮人散後
雍渠飛下水悠悠

梔子畫眉圖二首

簷蔔初開雪亞枝
枝頭好鳥立成痴
少年京兆風流處
似汝花間對語時

昔年曾伴董嬌嬈
長把春山笑倩描
今日梁園空見畫
烏啼花落鬢蕭蕭

桃花鵲圖二首

南湖二月雨晴天
兩兩相隨錦翼鮮
記得曾於何處見
桃花浪裏釣船邊

杜若靡蕪綠滿洲東風春水拍天流雙禽不受人拘束
宿食飛鳴得自由

紫薇堂獨坐二首

游絲落絮墜空堦黃鳥交交在綠槐獨對薇花清坐久
衙前初換午時牌

兩行官樹晝陰濃吏散長廊退食鐘忽見飛來楊柳絮
始知春色八分空

秋雨夜聞鄉中近事殊可感

得失無心總不驚
秋來偏動故鄉情
尋常意外梧桐雨
不似今宵不耐聽

盧翁挽詩二首

老向夷門受一廛
閒身自在水雲邊
大梁城裏人無數
若箇如翁八十年

名利無心任鬢皤
天留兩眼閱人多
懸知地下應含笑
得見兒登進士科

宣德堂前種桃二株戲作

緋桃兩樹遠移來親向堦前著意栽自是不如棠蔽蒂
謾留春色艷亭臺

謝惠牡丹

不將華屋薦金盤鈿合盛來露未乾麗色穠香都負却
空齋鎮日寂寥看

客夜聞雨

蕭蕭颯颯五更頭滴碎寒聲落瓦溝縱是客懷寬似海
也應難著許多愁

鄉人至夜話

形容不識識鄉音挑盡寒燈到夜深故舊憑君休更說
老懷容易便沾襟

憶故園山莊

病身長是戀家鄉短髮那堪著六梁只憶山莊松樹下
鳥啼清晝午陰涼

題竹

兩竿蕭灑墨淋漓師法東淮顧定之却憶紫薇堂後坐

翠陰搖曳午晴時

解籜新梢綠未全一枝斜出更娟娟
錢塘太史春風筆移得瀟湘到几前

題蘭

垂垂一簇石崖旁雅韻幽姿冠楚芳
天不遣生平地上可憐分付許多香

陰崖石髓養根芽半吐全開總是花
謾有國香誰見採美人迢遞在天涯

沅湘三月雨嘈嘈長得新苗尺許高惟有江潭憔悴叟
行吟收拾入離騷

懶共江籬杜若榮聊依蘚石寄幽情試觀種在堦庭者
未必天然似此清

寂寞孤蘂棘石邊自榮自悴自清妍空山零落知多少
垂老省圖一慨然

湘女祠前半夕暉採芳紉佩志空違年年綠遍東風裏
腸斷王孫去不歸

題牡丹

清平新調緩聲歌
醉眼惜騰看錦窠
今日江南林下見
滿頭白髮淚流多

海霞紅吐散天香
艷態嬌恣壓衆芳
歲歲殷勤分百朵
東風回首斷人腸

玉盤盂帶露華輕
別是風流一樣清
可惜種花人已去
觀圖惆悵不勝情

平生同有愛花心
每到開時輒共吟
垂老淒涼空見畫

人間何處覓知音

濟寧夜泊

疎星斜月在扁舟
寒鼓鼕鼕出郡樓
最憶往年何處聽
長安門外五更頭

獻陵挽歌

臨朝甫及半年餘
惠化仁恩遍九區
鑾輅仙遊驚太早
普天臣妾痛何如

宵衣纔見坐明堂
忽報承雲返帝鄉
父老白頭相對泣

餘生垂死待成康

四海謳歌仰戴深
驚聞厭代盡沾襟
惟餘蜂蟻偏愁苦
無路攀髯痛不禁

萬姓空銜喪考哀
宮車不見六龍回
金河河水都成血
盡是臣民淚灑來

去國多年別九重
草茅名姓簡宸衷
此生何處瞻天表
惟有清宵夢寐中

天語褒嘉百辟聞
升沈回首一時分
憐才誤到窮荒質

萬死難酬不世恩

宵旰憂勤日萬幾
豈知猶不忘寒微
恩榮尚在鑒興遠
忍抱遺弓淚滿衣

別周布政

兩歲勤勞曉夕同
忍將別淚灑東風
伏波門外還珠洞
載酒登臨盡屬公

運甓漫稿卷六

欽定四庫全書

運甓漫稿卷七

明 李昌祺 撰

詩餘

柳梢青 題具慶堂

素髮嚴親。酡顏慈母。眉壽雙全。屋潤家肥。兒恭婦順。孫
更能賢。夫妻快活團圓。這想是前生福緣。更積陰功
仍行好事。長享耆年。

天仙子 題趙仲務圖

憶昔維舟湘水曲，露浥芳蕤飄遠馥。褰裳徐步踏晴沙，
東一簇，西一簇，盡日徘徊看不足。嘆息光陰如轉轂，
老去觀圖指病目。花絕俗，葉絕俗，想像王孫清似玉。
公子才華偏蘊藉，九畹春光生筆下。幻成花葉恰如真，
他看罷，咱看罷，不信根苗原是畫。醉眼摩挲驚復訝，
端的人能移造化。風不謝，雨不謝，一任卷將堂上掛。

玉漏遲

慶表兄陳安行初度

水風萍末起三庚乍退新涼堪喜玩竹吟翁此日瑞呈
弧矢阿母親來慶壽賜玉液清香滑美端的延年却疾
頤神健體快飲不敢推辭試跪啜纔吞六塵如洗換
骨更形只消數甌而已自是長生有分便可在地仙班
裏却說道人中再誰如你

歸朝歡

題送陳知府考滿

灝氣漸消三伏暑商吹送涼侵白苧驛亭張宴餞邦侯
管絃低處聞金縷明月映鶴渚殷勤頻勸杯中醕這九

年用心撫卹百姓似兒女 青雲萬里期高舉第一功名端的取曾覃惠澤及疲民仍將忠愛酬明主臨別聽我語巖廊接武夔臯侶把仙瓢好教瀉盡天下望霖雨

臨江仙

題墨菊送陳知府行

一段秋光新寫就盛開不待重陽枝梢花葉互低昂巧將籬下艷幻作畫中芳 為問淵明何獨愛愛他晚節寒香從今移種上林旁時時承雨露歲歲傲風霜

摸魚兒

辛丑生朝自壽

笑吾生為緣凡骨神仙親遇難度隨羣逐隊

一作倒埃來顛去

塵裏年少遽成衰暮忙退步這鳳翼龍鱗老拙難攀附
況當末路並納祿投閑養疴延壽隨意做詩賦懸弧
旦罔極親恩已負持身惟謹清素繁華易歇同朝露嘆
幾箇人能悟非義富非義貴石崇元載何須慕乘除有
數全晚節尤難粗衣淡飯天自管分付

沁園春

山莊即事

山是何名族為甚姓地本荒涼水遠土磽田狹衆人棄

置天教與我卜築成莊嶺月為朋溪雲當客更有林風
時送涼養衰病惟靜窺周孔默契程張 升沈寵辱都
忘且懜懜騰騰醉幾場到東門嘆犬華亭嘆鶴悔之晚
矣徒自悲傷幻夢軒裳生涯筆硯陵谷從他海復桑幽
閑處謝天留老眼坐閱興亡

玉漏遲

送費同知考滿之京

螺川清徹底地靈人傑俗敦廉恥闔郡民家十有九家
詩禮幸得循良二守共撫字政平訟理多少貧窮感戴

章逢稱美 倏忽樂及瓜期看課最天官上聞丹宸不
次超遷位聯六卿班裏此際同寅北望比別箇倍增歡
喜端的是人生似公有幾

滿庭芳

賀人生 生日 四月 年六十

梅彈垂金柳綿飄雪綠陰清晝偏長畫堂初曉慶壽沸
笙簧花甲從頭再起任教他烏兔奔忙懸弧旦纔登耳
順痛飲又何妨 年年逢此日新茶新筍件件堪嘗喜
子能幹蠱繇戰文場那更閑身自在且休論紫綬金章

人都道天留老眼安坐閱滄桑

玉燭新壽舍弟昌明初度

春光忙似箭又三月初三牡丹開遍卯君初度當今日
祝壽惟深繾綣八人同氣但只覩五人顏面我一箇分
外龍鍾難似四人强健如今骨肉無多但有興能來
且休辭倦更教兒姪願箇箇努力聖經賢傳空詞一闕
笑寫當袖中鸞麈期歲歲生朝持杯乾勸

摸魚兒懷舊

記昔年十分輕健秦淮白下遊
遍結交盡是高懷侶多
伴舞衫歌扇心眷戀縱雨阻泥妨幽興何曾倦曲房小
院有鯽鱠銀絲蟻浮綠醞暢飲醉仍勸 分離也恰似
雲鴻海燕音書特寄無便風流杜牧今憔悴謾想柳眉
花面江萬轉山萬疊怎生能勾重相見光陰似箭回首
是衰翁思量前事清淚落如霰

鵲橋仙

自述

儒冠相誤虛名相誤衰病又還相誤
自憐身世總無成

乾枉了青春虛度 書生曾做京官曾做方面也曾經
做顛來倒去竟如何只落得一貧如故

長相思

春雨

朝淋漓暮淋漓到處牆傾土屋歌放晴知幾時 濕花
枝洗花枝平地瀾漫漫作池褰衣終日披

怕傾盆要傾盆傘笠都無強出門滿身泥水痕 行厭
聞坐厭聞溜響從朝達夜分聒聒雙耳根

南鄉子

送人之京

北上別家山韋布趨朝識聖顏水路七千端的遠艱難
了却公家事早還 暑退夏初殘拜別紅雲虎豹關歸
日正逢杭稻熟加餐受用鄉園暮景閑

石州慢 詠青娥眉淡竹草

異草從來花別另一般樣顏色藜間開遍既非紅紫又
非黃白閑園曠野多少黛嫩螺嬌冰盤帶露侵晨摘磁
鉢放輕研翠脂凝光澤 奇特最風流處寶鏡臺前繡
香奩側想未攄勻面慵將填額懶施粉飾且付描扇描

圖底須去問倭夷國誰製與佳名也端然消得

水龍吟

題都帥馮侯乃子二樂堂

豫章徐孺湖邊粉牆畫戟元戎第高閣畫靜疎簾風淡
博山香細椿樹長榮萱藋鎮茂荆花連蒂有珍般脆滑
純綿輕暖凡奉養都加意先祖竭忠帝室到如今子
孫承繼將門有將非徒英勇仍能孝義百戰成功萬鍾
為養也知容易願斯堂八柱堅如鐵柱永留人世

木蘭花慢

慶壽

過元宵五日燈山罷壽筵張喜盛集親朋爭喧鼓吹滿
泛壺觴八仙共教童子送蟠桃封寄與翁嘗甘比玉杯
雲液冷如金碗冰漿佳兒拜捧上高堂擘破散奇香
恰半枚入口身田溫暖腑臟清涼管取延年却老轉顏
紅髮黑更瞳方此去纔周花甲從頭再數何妨

賀新郎

新婚

冬暖天晴霽燦三星居然在戶煥輝庭砌照見堂前荆
花樹一朶忽成雙蒂聽花底笙歌聲沸傳道仙娥辭洞

府跨青鸞喜會文章壻態窈窕容端麗
知郎早有凌雲志小科場探花手段好教先試仍把風流京兆筆巧
畫翠眉纖細却慢慢大登科第況是妙年諧燕爾且親
前齊著爛塼戲衆喝采好兄弟

一半兒

長河新漲漫平沙古塚斷碑橫曠野日晚牧童爭望家
笑喧嘩一半兒騎牛一半兒馬

臨流農圃蔓瓜苗拍岸客船依葦篠月落五更風露饒

槽雙搖一半兒猶昏一半兒曉

風流子

題周叅政南峰書舍卷

錢塘最勝處龍井畔此地是君家有垂柳引鶯古松巢
鶴石栽蒲草池種荷花客來訪綠衣鋪座席紅袖過湯
茶評史講經賦詩觀帖竹間棊局窓下琵琶 況湖山
清雅僧房占不盡水竹烟霞贏得老辭畫省榮賜烏紗
便重尋舊隱歌當細聽酒當滿泛休問其他人道昔時
書屋今更光華

水龍吟

題鏤蘭亭石工陳福卷

右軍真蹟蘭亭秘藏玉匣昭陵久驀然驚見夜光明月
煥輝窓牖穆穆誠齋濡毫臨出遠過顏柳把瓊鉤寶畫
比方古本此本斷應居首 寫在金箋紙上競傳觀怎
禁磨揉故教鐵筆連圖入石要令難朽羨爾良工藝能
巧妙于今稀有細看來恰似生成喝采那雕鏤手

醉春風

書所見

雅淡嫌華麗嬌容原自媚如何驀地忽相逢記記記眉

掃春山裙拖秋水柳腰纖細
默逗文園意錦字憑誰
寄雨雲幽會甚時諧未未知共何人翠幃深處鎮偎
鴛被

長相思

春日郊外

桃未紅杏未紅近社郊原尚似冬連朝頻刮風
麥茸
茸草茸茸菜吐黃花三兩蘂春光何處濃

柳梢青

題秋塘圖

落盡芙蓉收殘菱芡晚色淒迷斷荇隨流枯荷折柄秋

老蘇堤 沙禽自在幽棲極浦外天連水低粉墜蓮房
波漂菰米煙暝湖西

點絳脣

新柳

東面風來旋吹輕綠回梢上眼兒纔放便做嬌模樣
到得成陰早又花飄蕩隋堤望和煙搖颺人去愁相向

念奴嬌

寄致收朱紀善先生

柳綿飛處政和風淡蕩輕飄晴雪憶殺故人千里外客
館怕聽啼鴉桂水危亭虞山古廟幾度同登謁君歸吾

去可憐辜負奇絕 長是夢見風標晨鐘敲醒無奈依
然別去歲魚箋蒙遠寄惟寫相思情切乞得閑身看山
玩水著甚酬風月只應詩酒興來還自怡悅

蘇幕遮

題清溪漁隱

浦雲收山月放紅蓼灣頭秋水生新漲一箇輕舟雙漿
蕩蕭散江湖富貴非吾望 擊空明浮滉瀟汀鷺渚鷗
處處長相傍馬首紅塵三百丈風吹不到蓑衣上

滿江紅

送陳僉事兄還鄉

春滿梁園韶光媚盛開桃李清明過數他花信只今餘
幾有客携書還故里畫船且向沙頭艤問此行歸去甚
時來明年裏征帆挂離歌起杯易盡情難已羨君家
賢弟列官風紀更道翁能敦友愛連枝同氣稱雙美想
細君笑聽鵲聲喧門頻倚

一半兒

風高飛鴈斷還連野迴宿雲舒復卷箇箇綠楊堪繫船
水連天一半兒原深一半兒淺

天淨沙

樂竈時燒榾柮松庖日饌伊蒲寧用雕盤鏤俎天寒歲暮村村風雪黃蘆

枯松倒挂懸崖寒梅正對空齋慣見山光水色不求身外黃金任築高臺

滿庭芳

自述

年衰病攻旬宣任重仕進心慵縱令勉強成何用齒豁頭童急退步離他鬧叢便隨意學做莊農辭官俸勤耕

苦種歲計不愁空

橋庵野夫文章本少事業全無半生苦被虛名誤早乞
微軀納印綬辭歸里閭買田園教繞村居忘形處麻衣
草屨放浪狎樵漁

閑中自憐人心不足世事難全算惟引退真長便過活
隨緣嘆老矣非徒此日賦歸歟且待明年思量遍心闌
意倦極品也徒然

榮枯吉凶都由自己不屬天公得時莽把聰明弄逞盡

英雄怎知道禍因惡積錯埋冤命與災逢床頭甕香濃
味重引到醉鄉中

江南故鄉山青水綠竹翠松蒼年來旋把幽居創菜圃
禾塲看花訪黃家四娘揷秧倩許宅三郎忘官況狂吟
醉唱退老白雲莊

追思舊游芳年豈再勝事都休幾回暗數當時友半在
荒丘將馬上風霜弊裘換鷗邊野水輕舟天成就忘懷
宇宙無喜亦無憂

天涯自傷叨恩祿厚永恩心長故園遥在西江上幾度
斜陽好弟妹相拋殞亡老情懷只抱悽惶那堪望雲山
煙浪真是斷人腸

歸田興饒官登二品世閱三朝粉闥畫省皆清要誤玷
元僚愛隱逸煙霞海嶠戀恩榮雨露雲霄量才調休閑
最妙偃息伴鷦鷯

蹒跚病軀人憐顯宦我笑貧儒烏飛兔走何曾駐白晝
髭鬚有斷簡殘編可娛無贏金剩帛堪儲清幽趣爐香

一炷坐愛小窓虛

光陰易道諸般勘破萬事宜休抗塵走俗乾生受著甚
來由賣了帶安排買牛綴成蓑准備划舟招朋舊晴窓
永晝濁酒且淹留

盈虛往來亡身為色喪命因財乖的罷了愚的在莫笑
痴騃種地畝動薈草萊啓軒窓淨掃塵埃心無累逍遙
物外且放好懷開


金字經 喜舍弟昌明至

雨意斑鳩喚春光杜宇催剛得相逢怎便回陪旋蕩新
釀醅同歡會飲乾休廝催

門掩斜陽暝簾垂靜夜長兒女燈前笑捧觴嘗滿杯清
更香懷宜放醉可能幾場

瓦釜芹羹美磁甌茗飲清垂老天倫喜合并聽兩三歸
鴈聲鳴相應感咱同氣情

白丁留跡少紅甲迸畦稠淡泊相看不強求休老身今
自由心無疚隨意度春秋



運甓漫稿卷七